

Naqqiut

Saqqummiussissut 22. august 2018-imeersoq taarserpaa

(Oqaaseqatigiit kingulliit sioqqullugit Katersugaasiveqarneq pillugu ataatsimiititaliap katitigaanera, piffissaq atuuffissaa akilerneqartarneralu pillugit aalajangersakkat oqaaseqatigiit ilanngunneqarput)

Uunga siunnersuut: Katersugaasiveqarneq pillugu Inatsisartut inatsisaannik allanngortitsineq pillugu Inatsisartut inatsisaat nr. xx, xx. xxx 2018-imeersoq

(Ilinniartitaanermut, Kultureqarnermut, Ilageeqarnermut Nunanut Allanullu Naalakkersuisoq)

Saqqummiussissut

Siullermeerinnineq

Naalakkersuisut sinnerlugit matumuuna saqqummiuppara Katersugaasiveqarneq pillugu Inatsisartut inatsisaannut allanngutissatut siunnersuut.

Siunnersuummi aalajangersakkamik ilanngussisoqarpoq Nunanut Allanngutsaaliugaasumut, sumiiffimmu Biosfære-qarfiusumut Avannaarsuani Kangianilu inissisimasumut, inuit pilersitaat tigussaasut kalaallinit aallaavillit, qanoq nutaangitsigineri apeqqutaatinnagit nunatsinniit anninneqarsinnaanngitsut, Nunatta Katersugaasivianit Allagaateqarfianillu akuersissutitaqanngitsumik.

Siunnersuullu aamma piginnaatitsissummik imaqarpoq, Naalakkersuisunik periarfissiisumik sumiiffinnut immikkut killilikkanut tunngatillugu malittarisassiorsinnaanermut, inuit pilersitaat, kalaallinit aallaavillit, qanoq nutaangitsigissusii apeqqutaatinnagit nunatsinniit annissisoqarsinnaannginnera pillugu, Nunatta Katersugaasivianit Allagaateqarfianillu akuersissutitaqarsimatinnagu.

Taamaasilluni naapigiarneqarpoq Nunatta Katersugaasiviata Allagaateqarfiatalu kissaataa, Nunami Allanngutsaaliugaasumi, Avannaarsuani Kangianilu Biosfære-qarfiusumi illersuinerlut atillugu malittarisassanik sakkortusisanik ingerlatitsiinnartoqarnissaanik, aamma sumiiffinnut allanut immikkut killilikkanut tunngatillugu sakkortusisanik malittarisassiortarnissamut tunngatillugu.

Siunnersuummittaqq erseqqissarneqarpoq nunatsinneersunik pigisanik anninneqarsimasunik Danmark-imut imaluunniit nunanut allanut, utertitsinissanik isumaqatigiinniarnerni aamma ilaasinnaasut kulturikkut pigisani sinneruttut, pinngortitamit katersani sinneruttut aamma tigussaasut allat immikkut naleqarluartutut nalunaarsorneqarsimasut.

Ilanngullugulu aamma erseqqissarneqarpoq pinngortitami oqaluttuarisaanermi nassaat maanna aamma immikkut naleqartutut nalunaarsorneqartalersut, pinngortitallu oqaluttuarisaanerani immikkorluinnaq qaqutigoortut nassaat, nassaartumut dusørinik akissarsisitsissutaasinnaalissasut.

Katersugaasiveqarneq pillugu ataatsimiititaliap katitingaanera, piffissaq atuuffissaa akilerneqartarneralu pillugit aalajangersakkat siunnersuummi ilaatinneqarput.

Taamatut oqaaseqarlunga siunnersuut inussiarnersumik Inatsisartunut oqaluuserisassanngortippara.